

# Kesan sampingan AZ cuma sementara



MOHD FAIZUL HAIKA MAT KHAZI DAN LIZA MOKHTAR

## Rakyat Malaysia tidak perlu bimbang pengeluar ditarik balik vaksin Covid-19 dari pasaran

**W**alaupun rakyat Malaysia telah menerima lebih 5.7 juta dos vaksin AstraZeneca (AZ), orang ramai tidak perlu panik dengan kesan sampingannya susulan tindakan syarikat pengeluar menarik balik vaksin Covid-19 berkenaan di seluruh dunia mulai minggu lalu.

Pakar Perubatan Kesihatan Awam Universiti Putra Malaysia, Profesor Dr Malina Osman berkata, syarikat farmaseutikal global Britain-Sweden itu berbuat demikian kerana vaksin AZ sudah tidak lagi berkesan untuk menangani varian baharu Covid-19 yang sentiasa berubah dan bermutasi dari masa ke masa.

Dr Malina berkata, keputusan syarikat

terbabit menghentikan pengeluaran dan menarik balik vaksin AZ dari pasaran adalah berkait rapat dengan kemampuan mereka untuk menambah baik vaksin berkenaan supaya selari dengan perkembangan jenis terkini virus Covid-19.

Beliau berkata, kesan sampingan yang serius dialami penerima vaksin bukan sebab utama keputusan penarikan berkenaan dibuat.

"Isu ini sebenarnya sama seperti ubat-ubatan dan vaksin lain kerana dari sudut kajian klinikal, AZ sudah memaklumkan mengenai kesan sampingan termasuk kes yang serius.

"Saya tidak nafikan ada sesetengah penerima vaksin AZ yang mengalami komplikasi yang tidak dapat dielakkan kerana dalam ubat-ubatan biasa pun timbul masalah, sama seperti selepas mengambil ubat tahan sakit dan ubat demam," katanya.

Akhbar Britain, *Telegraph* baru-baru ini melaporkan keputusan itu dibuat selepas syarikat tersebut mengakui dalam dokumen mahkamah bahawa vaksin berkenaan boleh menyebabkan kesan sampingan yang jarang berlaku dan berbahaya.

Dalam dokumen yang dikemukakan kepada Mahkamah Tinggi di London pada

Februari, AZ mengakui vaksin Covid-19 bukannya 'boleh, dalam kes yang sangat jarang berlaku, menyebabkan TTS atau trombosis dengan sindrom trombositopenia iaitu pembekuan darah dan kiraan platelet darah menjadi rendah'.

Menteri Kesihatan, Datuk Seri Dr Dzulkefly Ahmad pada Jumaat lalu memberi jaminan kerajaan akan menyediakan rawatan susulan bagi penerima vaksin Covid-19 termasuk AZ yang terbukti mengalami kesan sampingan ekoran vaksin yang diterima.

Dalam pada itu, Dr Malina berpandangan rakyat Malaysia tidak perlu bimbang secara melampau dalam isu berkenaan.

Beliau berkata, ini kerana vaksin AZ adalah selamat untuk digunakan semasa ia dihasilkan dan diedarkan di seluruh dunia

semasa situasi pandemik Covid-19.

"Bagaimanapun, berikutan perubahan semasa dan mutasi virus, maka vaksin AZ sedia ada tidak mampu lagi menangani jenis terkini.

"Jadi orang ramai yang pernah menerima vaksin AZ tidak perlu bimbang kerana komplikasi atau kesan sampingan suntikan itu sepatutnya hanya dirasai dalam tempoh satu hingga tiga minggu.

"Jika lebih sebulan atau lebih enam minggu maka ia bukan akibat kesan sampingan suntikan vaksin Covid-19," katanya.



DR MALINA

## VAKSIN & KES COVID-19 DI MALAYSIA

### PENGAMBILAN VAKSIN

- ▶ **72,873,674**  
Jumlah dos keseluruhan
- ▶ **28,138,175**  
Jumlah penerima Dos 1
- ▶ **27,551,028**  
Jumlah penerima Dos 2
- ▶ **16,352,198**  
Jumlah penerima Dos Penggalak 1
- ▶ **832,273**  
Jumlah penerima Dos Penggalak 2

### KES COVID-19 DI MALAYSIA

- ▶ Kes pertama dikesan: **25 Januari 2020**
- ▶ Jumlah kes jangkitan: **5,278,406**
- ▶ Kematian: **37,348**
- ▶ Sembuh: **5,233,268**

Sumber: Kementerian Kesihatan Malaysia (2024) dan Worldpmeters.info.

